

## PILIMON

Dini ghi n:ii ngê Póól ngê Yesu u kópu pi knî ye doon:aa tpaê, pi ngmê u pi Pilimon, Póól u kópu dyuu ka kêlîmî mbê wo, Yesu u yoo vy:o u ngwo ghê wo. U kuwó dini ghi ngê Póól p:aani p:aani loo, myenté Yesu u kópu pi knî ye doon:aa tpaê. Dpodoni doo dódó, Nju tpémi daa yi nuu u kópu ngê pyodo, wod:oo Póól mgîmî ngópu, u yi y:e doo kwo, Nmî vy:a. Lóma lede knî y:oo yi kêlé dyé ngópu, mbwa k:oo km:êê ngópu, u kuwó dini ghi ngê Lóma dy:ââ ngópu. (Dpodo 21-28)

Dini ghi n:ii ngê Póól Lóma doon:aa ya, pini n:ii Pilimon p:uu wop dpîmo dpodo, Onésimas, yi pini mbêpê wo, Lóma loo. Póól y:i mîné pyw:ângo, u kópu dyuu ka kêlîmî mbê wo, Yesu u yoo vy:o mye ghê wo. Póól ka yimî vyu, kwo, Pilimon ka kîní mbêpê wo, wod:oo Póól ngê pweepwee pee ngmê d:êê ngê, Onésimas ka y:ângo, kwo, Pilimon ka dpî nuw:e.

Yi dini ghi ngê yi l:êê ghi alanté doo a ya, wop dpodo pyu n:ii dpîmo mbêpêmbêpê, u kada pini ngê mêdpîmo mumu knomomê, u ntââ d:ud:umbiy:e pî vyâ. Póól ngê u yi u ngwo dêpwo kwo, Pilimon ngê Onésimas vya ngê, u yi u ngwo doo kwo, U dono mbodo kn:ââ vyuwo kéé ngê, u lama choo ya, Kî nmî mbwó.

Pweepwee pee n:ii u kwo dy:ââ ngê, ala yi pweepwee pee.

<sup>1</sup> Nê Póól, Yesu Kédisu p:uu dpodo u l:êê dîy:o mbwa k:oo al:ii anîné kwo, nmî mbwó Timoti k:ii al:ii anyinê tóó mo. A mbwó Pilimon, ala

pweepwee pee nga nîê dyede. Yesu Kédisu p:uu ntee n:aa dpodo, yinté p:uu my:ee dpodo. <sup>2</sup> Nmî tîdê Apiya ka a mb:aamb:aa dpî yéni, nmî mbwó Akipas ka a mb:aamb:aa myoo yéni, pini n:ii u k:ii Setan p:uu nipi nmo l:êê té. Yesu u yoo yélini ngomo k:oo wunê wuwó ngê, a mb:aamb:aa ye myoo yéni. <sup>3</sup> Nmî Mî Chóó Lémi, nmî Lémi Yesu Kédisu u k:ii, dny:oo a ngêêpî nmyo, mb:aamb:aa ngê nmye myedny:oo a vyuwo.

*Pilimon u l:êê dîy:o Póól ngê nmî Mî u ngwo doo kwunokwuno*

<sup>4</sup> A mbwó Pilimon, dini ghi n:ii ngê n:aa ngêpê yédi, l:êê dîy:o nmî Mî n:aa kwunokwuno ngê, \* <sup>5</sup> mu kópu u dîy:o a lama ka tóó, nmî Lémi Yesu ka dpodombiy:e nye kélímî, myenté u yoo yi nuu ghi dmi nódó mye tóó. <sup>6</sup> L:êê dîy:o alanté nîê ngêpê yédi, yélini yi k:ii nmî Lémi ka nmye kélímî té, u ya a nga a kwo, Yesu Kédisu u kópu mb:aa yintómu nmyi lama dny:oo ya. \* <sup>7</sup> A mbwó, nmî Lémi u yoo yi nuu ghi dmi nódó a tóó, yi gha dmi mb:aamb:aa ngê nye pyépi ngê. Yi kópu u l:êê dîy:o w:aa nê pyw:ango, a nuu u kópu yinyinê d:uud:uu too.

*Kópuni Póól ngê Pilimon ka dmy:ee ngê*

<sup>8-9</sup> Yesu u yoo yi k:ii nmî nuu ghi dmi nódó a tóó, u l:êê dîy:o kópu nga ngmênîê dmyinê. Yesu Kédisu ngê kada pini ngê a pyódu noo, u l:êê dîy:o kópuni yi kópu mbêmê nga anê vyi knomomê, doo u ntââ a wépi daanyinê puwâ. Ngmênê yi kópu mbêmê kópu nga dênîê tpaê. Nê Póól, vy:enevy:ene kêpa n:aa kwo, myenté Yesu Kédisu p:uu dpodo

\* **1:4:** Lóma 1:8-9      \* **1:6:** Kílosa 1:9

u l:êê dîy:o mbwa k:oo anînê kwo. Yi kópu u l:êê dîy:o nînê kwunokwuno ngi, <sup>10</sup> Mw:ââkó, a tp:ee Onésimas dpodombiy:e nangê kpada. Yi pini mbwa k:oo a ka a loo, u mí ntee pini ngê u ngwo ní pyodo, Yesu u yoo vy:o ní kââ. \* <sup>11</sup> Wunê dnyinté m̄:uu doo a dpodo, ngmênê ala ngwo u nuw:o kêdê ngmêê, a p:uu mb:aamb:aa ngê ka dpodo, u ntââ mb:aamb:aa ngê m̄:uu amyedîn:aa dpodo.

<sup>12</sup> U nuu ghi a nódo dnyinté daa tóó, ngmênê nga mênînê dyede. <sup>13</sup> U ya a nga doo kwo, Nê ngîmî, a p:uu pîchoo dpodo, dini ghi n:i ngê nmî Lémi u kópu dyuu u l:êê dîy:o mbwa k:oo anî kwo. Al:i w:iin:aa tóó, ntee p:ee ngêêpî nê, u ya a nga doo kwo, Onésimas ngê yinté pêdoo ngêêpî nê. <sup>14</sup> Ngmênê kêle, daanê ngîmî, myenté u l:êê dîy:o dyaa nga daanê chedê. Yi kópu ñyóó lama a tóó, a ka dpo vyi ngi, a ka anyinê dy:ââ, ó daanyinê dy:ââ? \*

<sup>15-16</sup> Onésimas ngê kópuni d:uu ngê, ndoo apê kópu mb:aa ngê nga wa pyódu. Mwiyé n̄modo pyu ngê doo a ya, dye ghi daa daadîi m̄:uu dêpwo a dpodo, ngmênê ala ngwo m̄wó ngê dê pyódu, m̄:uu amaan:aa dpodo, u k:i nipi adpîn:aa ya, chedê ngê daawa pyódu. A nuu u pi ngê ntee dê pyódu, nuu u pi ngê yinté amyimî pyódu, mu kópu u dîy:o m̄:uu adîn:aa dpodo, nmî Lémi u yoo vy:o m̄wó ngê amyedîn:aa ya.

<sup>17</sup> A mbwó, nmî Lémi p:uu nipi nyipu a dpodo. Yi kópu u l:êê dîy:o, nga wanê ní knomomê, ntee a ka anyin:aa a vyyuwo, Onésimas ka yinté myecha a vyyuwo. <sup>18</sup> Apê dono nga ngmê d:uu ngê, ó n̄apî

\* **1:10:** Kîlosa 4:9 \* **1:14:** 2 Kódin 9:7

ngmê t:âmo ngê, yi kópu a chóó wanî l:âmo. <sup>19</sup> Nê Póól, ala kópu dyuu a chóó a kêê ngê n:aa d:êêd:êê, yi ndapî a chóó m̄iy:e am:aan:aa wumo. Ngmênê a mbwó, kópu ndîî l:êê d̄iy:o wunê nga ngmênê d:uu ngê, nmî Lémi u yoo vy:o n:uu kaa nyoo, ghê kamî u ngwo nyinê pyw:ângo. \* <sup>20</sup> Nyââ, a mbwó, kópuni nga d:a dmyinê, dpo d:uu ngi, mu kópu u d̄iy:o nmî Lémi Yesu Kédisu p:uu nipi nye dpodo mo. Yi kópu u l:êê d̄iy:o a gha mb:aamb:aa ngê wa pyódu.

<sup>21</sup> Ala pweepwee pee nga d:a d:êê, mu kópu u d̄iy:o a lama ka tóó, kópuni nga d:a dmyinê, ntênê wanyi d:uu, kópu mê yilî amy:ii d:uu té. <sup>22</sup> Myenté ngomo k:oo ngomo ghi a l:êê d̄iy:o ngmêdpo l:âmo ngi, mu kópu u d̄iy:o a lama a tóó nmî Mî ngê nmyi ngêpê wa a ny:ee té, mbwa k:oo wa pw:ii nê, nmye wa a dy:ââ nê. \*

### *Póól u nd:uu tpapê*

<sup>23</sup> Pini n:ii k:ii Yesu Kédisu u l:êê d̄iy:o mbwa k:oo nipi nye kwo mo, Epapîdas, u mb:aamb:aa nga da dy:ââ, \* <sup>24</sup> myenté yélini yi k:ii nipi nmo dpodo té, Mak, Adistakas, Dimas, Luukî, yi tpókni y:oo yi mb:aamb:aa nga myeda dy:ââ ngmê. \*

<sup>25</sup> Nmî Lémi Yesu Kédisu nmyi gha dmi knî ye mb:aamb:aa ngê choo a vyuwo.

Wu u dí.

---

\* **1:19:** Nkal 6:11      \* **1:22:** Pilipay 1:25      \* **1:23:** Kílosa 1:7;  
4:12      \* **1:24:** Kílosa 4:10; 2 Tim 4:10-11; Dpodo 16:10

**NMÎ MÎ U KÓPU DYUU**  
**The New Testament in the Rossel Language, also called**  
**the Yele Language, of Papua New Guinea**  
**Nupela Testamen long tokples Yele Rossel long Niugini**  
copyright © 1998 Wycliffe Bible Translators, Inc.

© 2011-2013 Wycliffe Bible Translators, Inc.

Language: Yele Rossel (Yele)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-11-03

---

PDF generated using Haiola and XeLaTeX on 21 Mar 2024 from source files dated 13 Dec 2023

f23d3065-5277-5598-adb2-6416a21ad128